

四庫全書

史部

欽定四庫全書

史部

西湖遊覽志餘卷十一

詳校官太僕寺少卿臣李廷欽

編修臣程嘉謨覆勘

總校官編修臣王燕緒

校對官中書臣葉蘭

謄錄監生臣龔際美

欽定四庫全書

西湖遊覽志餘卷十一

才情雅致

明 田汝成 撰

梁貢父曾燕京人大德初為杭州總管嘗作西湖送春
木蘭花慢詞云問花花不語為誰落為誰開算春色
三分半隨流水半入塵埃人生能幾歡笑但相逢樽
酒莫相推千古幕天席地一春翠繞珠圍彩雲回首

暗高臺烟樹渺吟懷拚一醉留春留春不住醉裏春
歸西樓半簾斜日怪銜春燕子却飛來一枕青樓好
夢又教風雨驚回此詞格調俊雅不讓宋人也

蘇爾約蘇哈雅者阿爾哈雅之孫也其父名袞格根

原作貫只哥

遂以貫為氏號酸齋年十二三膂力絕人使健兒驅
三惡馬疾馳持槊立而待馬至騰上之越二而跨三
運槊生風觀者辟易或挽彊射生逐猛獸上下峻阪
如飛諸將咸服其趨捷稍長折節讀書目五行下吐

辭為文不蹈故常意旨皆出人意表仁宗時為翰林
學士稱疾還江南賣藥錢唐市中結廬龍華山詭姓
名易服色人無識者偶過果山灤見渙父織蘆花為
被欲易之以紬渙父疑其為人陽曰君欲吾被當更
賦詩遂援筆賦云採得蘆花不浣塵翠簑聊復藉為
裯西風刮夢秋無際夜月生香雪滿身毛骨已隨天
地老聲名不讓古今貧青綾莫為鴛鴦妬欸乃聲中
別有春竟持被去人間喧傳蘆花被詩其依隱玩世

多類此酸齋有二妾名洞花幽草酸齋臨終有辭世
詩云洞花幽草結良緣被我瞞他四十年今日不留
生死相海天秋月一般圓

貫酸齋隱居錢唐一日郡中數衣冠士人遊虎跑泉飲
間賦詩以泉字為韻中一人但哦泉泉泉久不能就
忽一叟曳杖而至問其故應聲曰泉泉泉亂迸珍珠
箇箇圓玉斧斫開頑石髓金鉤搭出老龍涎衆驚問
曰公非貫酸齋乎曰然然遂邀同飲盡醉而去

鄧善之文原其先綿州人父漳徙錢唐遂為錢唐人至
元中為杭州路儒學正以春秋立教累官翰林侍講
學士辭官還錢唐盧亘作詩十首送之其一云北門
古深嚴論思寄籌度自非鴻才士訓誥何由作夫君
出巴蜀文采動京洛十年掌絲綸摘藻揚景鑠荆璞
抱瑾瑜龍淵淬鋒鏑肯獻上林賦寧居天祿閣即今
觀浙江春戀睇金雀黃圖鬱紫氛絳節生碧落依然
難為情清霜養飛藿其二春秋嚴筆削凜若執玄鉞

君獨抱遺經結髮飽剗剗明剖是非心微探義理窟
下視羣兒愚爭端王正月竭來奮直筆浩然心思竭
王功與帝德昭昭日月揭胡為厭詞林南欲觀溟渤
榮華若浮烟汗簡青不滅其三詞林富聲華幾人得
精悍悠悠三百年篇翰孰承續夫君清廟器裸薦盛
圭瓚五就惜繁纓九旂載雲罕依依風向翔忽忽月
新滿冷然時雨情短章不可斷其四風雨妬芳華狼
莠深嘉穀天地豈不仁盛德稟命獨明廷萃羣英四

門延穆穆既卜渭水釣又起傅岩築聲華何岌業衆
輻輳一轂鑾坡儼清韻碩人歌在軸願言往從之星
駕命宜夙豈知彼玄鳥戢翼辭雲屋幸無素絲悲庶
免窮途哭其五離離天星高皓皓雲月光候鴈過楚
澤蟋蟀鳴中堂天時諒難測徒然多感傷念子去意
遠沉憂結衷腸憶昔初奉歡露白春蘭芳清尊罷新
製妙趣深濠梁飛景急西匿川流浩湯湯玄髮淒歲
晚木脫天雨霜蔓草豈容惜松栢在高岡其六翰林

子元子武庫森戈矛英聲邁千古逸韻橫九州與君
契金蘭投分何綢繆清和謝夷惠典刑追韓歐坐令
人文煥允塞昭王猷念君獨遠邁寥落行人愁木瘦
楚山曉風靜寒江流何當駕飛車却憶崑崙丘塵埃
滿腥腐朝暮同蜉蝣其七暘谷上寒日影射扶桑枝
瞬息及中天流光迅難持人生百年內昂昂何所施
孤鴻東南征浮雲西北馳可憐萬感身會合須臾期
安得弄明月皎皎遠憂疑折花芙蓉浦蕩槳江潢涯

優游以卒歲身名良不隳其八游雲蒼鱗穹閭闔不
可叫徒令虎豹關日月近輝耀濛濛八表塵隱隱萬
景竅泯然一歸途伊誰執其要栖栖聖者徒禮樂懷
幼眇閉門忍朝饑風雨深蓬蓼今年江海去光景短
螢燭禾黍滿故墟閭巷餘返照揮絃送飛鴻古今入
長嘯其九昔我適吳會日夕承歡顏高堂樂起舞綵
服何徧爛東海洶波濤西湖翠烟鬢北歸餘十年謬
蹟通朝班家禍一朝集音容何可攀悲號蒼穹迴往

事思日艱命窮時亦迫志弱體自孱安得騰化術從
君超人寰執手不忍訣臨風涕空潛其十我思君勿
思君歸我當憶十年膠在漆一旦各異域吳江激微
波震澤起溟色鷗鵬隔天地鴈鷺雜南北念我平生
友愴恨摧胸臆獨看燕山雲歲暮日初昃永言長風
翔情寄南鴻翼

虞伯生寄浙江提舉鄧善之詩山雨不來喧靜夜汀雲
猶為護晴朝一群青雀墻花老幾箇黃鸝苑樹遙何

有深心期管樂獨無高步接松喬未能逕去成飄忽
且可相從慰寂寥戴表元送砥平石歸天竺兼東鄧
善之詩聞說西湖也自憐君行況是早春天六橋水
暖初楊柳三竺山深未杜鵑舊壁苔生尋舊刻新岩
茶熟試新泉城中諸友須相覓西蜀遺儒草太玄

陳衆仲旅莆田人元統初為江浙儒學副提舉薩天錫
贈詩云江南少識陳衆仲闕下才名北斗齊直閣每
從花底見揮毫曾向御前題觀魚小海鳳新浴立馬

上林鶯亂啼今日西湖堤上路獨騎款段踏春泥衆
仲在任雅好湖山意有所屬便乘興獨往流連竟夕
得佳句則欣躍而歸後為應奉翰林有元夕懷錢唐
詩云武帝親祠太乙神流光洵旭動星辰竹宮典禮
猶存漢軹道山河已易秦香逕至今啼木客露盤無
復泣金人紅燈幾點東風裏猶是元宵一度春

虞伯生集臨川人少不偶浪遊錢唐一日偕楊仲弘范
德機訪微煉師於湖西求召僊鬼煉師置箕懸筆書

符作法有頃箕動筆運書曰某當境神也煉師叱曰
吾不召汝復書曰欲乞虞公撰一保文申達上帝以
求陞耳衆勸伯生許之翌日文成焚之湖濱逾旬再
詣煉師禱召神復降曰某已獲授城隍謹候謁謝公
必貴顯幸毋自怠既而伯生由校官至奎章閣侍書
學士封仁壽郡公始信神言之不妄也

伯生嘗與歐陽原功陳衆仲歌宋高宗所改于國寶沁
園春詞尋腔再度心曠神怡遂援筆書之復作一絕

繼其後云重扶殘醉西湖上不見春風見畫船頭白
故人無在者斷橋楊柳舞青烟又與張伯雨善寓開
元宮盤桓累月題其來鶴亭云羣真終夜降華陽曾
聽僊音近玉床語罷是誰留別鶴待君寥廓共馳翔
又云亭前春雨長蒼苔海鶴長鳴一日來從此琴心
三疊裏月明時見影徘徊

楊仲弘載其先浦城人後家錢唐與虞伯生揭曼碩范
德機齊名時稱虞楊范揭云洪武初祀於杭學鄉賢

祠仲弘詩以宗陽宮玩月為絕唱然他作如風雨五
更雞亂叫江湖千里鴈相呼挾書萬里朝明主仗劍
三年別故鄉牕間夜雨消銀燭城上春雲壓綵旗空
桑說法黃龍聽見葉翻經白馬馱沉雄典實行輩推
之又湖上書所見詩采蓮女郎蓮花腮藕絲衣裳難
剪裁瞥然一見唱歌去荷葉滿湖風雨來

黃潛贈仲弘詩別離驚夜雨蹉跎媿後塵祇今才有數
多爾術能神玉唾春風濕烟霄碧樹新謬慚推吏事

吾敢望平津杜清碧寄仲弘詩老來自愛黃叔度少
日真期魯仲連高卧獨無田二頃曳裾誰有客三千
滄波渺渺浮鷗鳥白日翩翩換歲年却憶江東楊少
尹劇談終夜不成眠

趙子昂孟頫宋秦王德芳之後也居湖州仕元為浙江
儒學提舉翰林院學士世宗嘗問葉李留夢炎優劣
子昂對曰夢炎臣之父執有大臣器帝曰汝以夢炎
賢於李耶夢炎在宋為狀元位至丞相當賈似道誤

國罔上夢炎依阿取容李布衣乃伏闕上書是賢於
夢炎也汝以夢炎父友不敢斥言其非可賦詩譏之
子昂所賦詩有往事已非那可說且將忠直報皇元
之語議者謂子昂適所以自譏也其西湖絕句詩云
春風柳絮不能飛雨足蒲芽綠更肥正恐前呵驚白
鷺獨騎款段遶湖歸流連光景異於忝離之感矣

鮮于伯機樞漁陽郡人為浙江行省都事因居杭州風
流文雅與吳興趙子昂相伯仲遷太常簿子昂嘗貌

其神虞伯生贊之曰歛風沙裘劍之豪為湖山圖史
之樂翰墨軼米薛而有餘風流擬晉宋而無忤是以
吳興公運畫沙之錐刻希世之玉使千載之下眼識
二妙于遐邇伯機有鶴死非命瘞之西湖士夫多有
詩悼之梁曾詩云翠栢屏前竹闌曲幾見毳毼雪衣
舞平生風雲萬里心零落湖山一丘土世間萬事不
可虞竒禍何由也到渠不見嵇康遭殺戮令人空嘆
養生書張伯雨詩羽衣凍損雪爛斑碧落遊魂杳不

還和靖船歸籠尚閉浮丘經在壽能慳長身幣裹玄
黃內舊蹟苔封紫翠間擬撰瘞銘修故事寄書先寄

九華山

伯機嘗蓄一蠻獅水滴瑩如碧玉鬚髮眉眼膚理衣摺
種種精緻蠻腦為竅置吸子乃漢物也把玩未嘗釋
手一日於斷橋水閣倚闌偶墮吸子湖中百計求之
不得悵怏怏嘆形神凋枯既他往踰三年復來斷橋
俯瞰湖波適霜降水落泥漬星朗曩時吸子儼然可

掬便解衣汨取如獲至寶易號曰神人獅子一時能
詩者歌詠其事

張仲舉者其先晉寧人父為杭州鈔庫副使因家焉翦
少時豪放不羈好蹴踘喜音樂父憂之一旦翻然易
業閉戶讀書從仇仁近遠以詩文名海內累官至翰
林學士承旨所著有蛻庵集東西馬塍春行東平湜
伯客詩清明時節每多陰楊柳人家花滿林潑火乍
收連日雨賞春長負百年心鳬翁一一塘蒲暖雉子

斑斑隴麥深為報能詩平處士剩携芳酒共幽尋天
竺訪項可立不遇詩葛洪川畔千年寺路遶長松一
澗分潭影青移行處岫嵐光白散望中雲猿公吟樹
應思侶鹿女銜花不亂羣常羨山僧專勝槩水聲林
下百無聞清明雨晴遊包山龍華寺過慈雲嶺詩當
年玉輦此經行古寺猶題扈從名龍鳳識空山氣歇
馬羊劫換海波平野桃着雨春紅落嶺路霾雲濕翠
生日暮人歸烟樹黑飢鶩啼雨上宮城春日泛湖詩

春來渾不到湖邊偶逐東風上畫船花氣暖熏黃鳥
岼水光晴展白鷗天綠樽興劇頻呼酒銀管聲高正
輓絃我比放翁應更放看花不獨海棠癡招韓伯清
泛湖詩南園攜手賞芳紅喚取能歌盛小叢傳與春
風留杏萼明朝開向曲聲中段橋春水綠初柔更有
群鳧來上遊好借鷗夷盛酒去玉簫吹上畫船頭自
悼詩十二樓空月自明一圓一闕總關情每從畫裏
瞻瓊在復向詩中記受生魂不歸來歌楚些夢還驚

覺厭秋聲遙知別鶴離鸞思只在芙蓉海上城夢中
常苦不分明天上人間各有情桃葉柳枝無限思靈
芝瑞露可憐生蕙蘭漫織迴文錦鸚鵡猶傳響板聲
欲得近音何處問風烟遮斷武林城

張仲舉至正初為集慶路學訓導御史下學點視廩膳
隣齋出對云豸冠點饌是日適用驢肉仲舉戲續云
驢肉作羹蓋御史河南人也聞之大怒欲逮捕之乘
夜逃揚州時揚方全盛衆聞其名爭延致之仲舉肢

體昂藏行則偏竦一肩韓介玉為詩嘲之云垂柳陰
陰翠拂簷倚闌紅袖玉纖纖先生掉臂長街上十里
朱樓盡下簾一座大笑時有相士在座或曰仲舉病
鶴形也相士曰不然此雨淋鶴形也雨霽則冲霄矣
後入大都致位通顯仲舉長於詩其近體長短句尤
工文不如詩而每以文自負常語人曰吾於文已化
矣蓋未嘗構思也他日翰林學士實喇卜示以所為
文請易置數字苦思者移時終不就實喇卜曰先生

於文已化矣何思之苦也仲舉大笑蓋仲舉善謔引
笑故戲之如此

楊廉夫維禎初居吳山鐵冶嶺故號鐵厓既得鐵笛更
號鐵笛雅好聲妓名徹都下葉居仲寄之詩云聞道
西湖載酒還飛瓊弱翠擁歸鞍可無私夢登金馬剩
有春聲到玉鑾異國頓消鄉井念小堂新作畫圖看
野人未納彭宣履獨向清溪把釣竿晚居淞江有四
妾竹枝柳枝桃花杏花皆善歌舞有嘲之者云竹枝

柳枝桃花吹彈歌舞撥琵琶可憐一個楊夫子化
作江南散樂家

楊廉夫湖上嬉春體五首其一今朝立春好天氣況是
太平朝野時走向南隣覓酒伴還從西墅買花枝陶
令久辭彭澤縣山公只愛習家池宜春帖子題贈爾
日日春遊日日宜其二西子湖頭春色濃望湖樓下
水連空柳條千樹僧眼碧桃花一枝人面紅天氣渾
如曲江節野客却似杜陵翁得錢沽酒勿復較如此

好懷誰與同其三何處被春惱不徹好春最好是湖
邊不須東家借騎馬自可西津買蹋船鷺子遶林紅
葉亂鳬雛衝浪碧花圓段家橋頭猩色酒重點春衣
沽十千其四入山十里清涼國三百樓臺迤邐開岳
王墳前弔南渡隱君寺裏話西來接果黃猿呼一箇
探花白鹿走千回風流文采湖山主蘇白應須屬有
才其五長城小姬殊可憐紅絲新上琵琶絃可人坐
上三珠樹美酒沙頭雙玉船小洞桃花落香雪大堤

楊柳掃晴烟明朝紗帽青藜杖更訪東林十八僊秋
日班超齋招飲湖上詩七月六日流火驕故人重有
濠梁招洗車快借雙星雨打鼓如迎八月潮下馬題
詩岳王寺解貂沽酒段家橋西湖顏面晚更好水晶
宮中吹玉簫

廉夫嘗訪瞿士衡以鞋盃行酒命其姪孫宗吉詠之宗
吉作沁園春以呈廉夫大喜即命侍妓歌以侑觴詞
云一掬嬌春弓樣新裁蓮步未移笑書生量窄愛渠

儘小主人情重酌我休遲醞釀朝雲斟量暮雨能使
麴生風味奇何須去向花塵留蹟月地偷期風流到
處偏宜便豪吸雄吞不用辭任凌波南浦惟誇羅襪
賞花上苑祇勸金卮羅帕高擎銀瓶低注絕勝翠裙
深掩時華筵散奈此心先醉此恨誰知

廉夫西湖竹枝詞蘇小門前花滿株蘇公隄上女當壚
南官北使須到此江南西湖天下無鹿頭湖船唱赧
郎船頭不宿野鴛鴦為郎歌舞為郎死不惜真珠成

斗量家住西湖新婦磯
勸郎不唱縷金衣
琵琶元是韓朋木
彈出鴛鴦一處飛
湖口樓船湖日陰
湖中斷橋湖水深
樓船無柁是郎意
斷橋有柱是儂心
病春日日可如何
起向西牕理琵琶
見說枯槽能卜命
柳洲街口問來婆
小小渡船如缺瓜
船中少婦竹枝歌
歌聲唱入瑩篴調
不遣狂夫橫渡河
勸郎莫上南高峰
勸儂莫上北高峰
南高峰雲北峰雨
雲雨相催愁殺儂
石新婦下水連空飛
來峰前山萬重
不辭妾作

望夫石望郎或似飛來峰望郎一朝又一朝信郎信
似浙江潮浙江潮信有時失臂上守宮無日消

楊仲弘和詞西子湖邊楊柳花隨風飄泊到天涯青春
遇著歸來燕銜入當年王謝家一種腰肢分外妍雙
眉畫作月娟娟春風吹破襄王夢行雨行雲若箇邊
宋誠夫和詞舊時家住黑橋街二十餘年不往來憑
仗使君一問訊楊梅銀杏幾回開薩天錫和詞湖上
美人彈玉箏小鶯飛度綠窻樨沈郎雖病多情在倦

倚屏山不厭聽鄭明德和詞岳王墳西是妾家望郎
不見見棲鷗孤山若有奢華日不種梅花種杏花張
伯雨和詞光堯內禪罷言兵幾番御舟湖上行東京
隣舍宋大嫂就船猶得進羹羹貢泰父和詞葛嶺東
家是相門當年甲第入青雲樓船車入裏湖去可曾
望見岳王墳字文子貞和詞蘇小門前騎馬過相逢
白髮老宮娥自言記得前朝事只說當年賈八哥賈
治安和詞郎身輕似江上蓬昨日南風今北風妾身

重似七寶塔南高峰對北高峰鄭慶父和詞北高峰
頭儂望夫望見西子下姑蘇脂塘水腥吳作沼莫將
西子比西湖黃子久和詞水僊祠前湖水深岳王墳
上有猿吟湖船女子唱歌去月落滄波無處尋唐子
華和詞門前楊柳亂吹花第一橋頭第一家馬上郎
君休挾舞柳枝深處有慈鴉陳子平和詞樓下攤錢
還上樓花前夜醉曉扶頭不知命犯何星宿一日猖
狂百日愁楊謹思和詞大船槌鼓銀酒缸小船吹笛

紅繡牕鴛鴦觸櫂忽驚散荷花深處又成雙燕子來
春鴈來秋曾見錢王衣錦游英雄漫說八百里只管
東西十四州獅子峰頭揀將旗鳳凰山下草離離三
宮去後宮門閉恰似錢王納土時朱仲文和詞南北
高峰作鏡臺十里湖光如鏡開行人有心都照見勸
郎肝膽莫相猜歐陽彥珍和詞第一橋邊第一家
皮船子送琵琶妾身自是良家女不是當年蘇小家
倪元鎮和詞愁水愁風人不歸昨夜水沒釣魚磯踏

盡蓮根終無藕着多柳絮不成衣桐樹原栽金井西
月明照見影離離不比蘇公堤畔柳烏鴉飛過鶉鴝
棲高敬臣和詞第四橋頭第一灣看魚直上玉泉山
大魚已逐龍飛去留得當時舊賜環于彥成和詞楊
柳樹頭雙鶉鴝雨來逐婦晴來呼鴛鴦到死不相背
雙飛日日在西湖丁復和詞上塘楊柳下塘陰阿儂
愛人不愛金塘水西來東入海水深不似阿儂深錢
思復和詞阿姊住近段家橋山妬蛾眉柳妬腰東山

井頭黑雲起早回家去怕風潮郊九成和詞妾家西
湖住橫塘門前楊柳萬條長憑郎醉後莫折斷留待
重來繫馬韁風篁嶺頭西日暉青龍港口新月微放
船過去還早在待取一道夜歌歸馮士卿和詞與郎
情重為郎容南北相看只兩峰請看雙投橋下水新
開兩朶玉芙蓉顧進道和詞楊白花開風滿天花開
成絮不成綿不如落向西湖水化作浮萍箇箇圓郎
子別時秋月明說道歸時春水生曉起門前聽過馬

馬嘶都是別人行馬本道和詞吳姬軋軋小車紅爭
來陌上看春風不敢高聲唱歌去恐驚丞相在船中
百花樓頭聞馬嘶郎從花裏開金鷄朝朝倦起朱簾
望不是郎歸不下梯宋無逸和詞十三女郎不出門
父娘墓在葛山根同携女伴踏青去不上道傍蘇小
墳韋德圭和詞湖中艇子風徐徐秋水蕩漾金芙蓉
釣魚不是貪雙鯉為恐腹中藏素書張翔南和詞南
高北高峰頂齊錢塘江水隔湖西不得潮頭到湖口

郎船今夜泊西溪張希顏和詞孤山脚下路三叉孤
山墓上好梅花不似馬塍桃李樹隨春俱送到人家
朱伯常和詞小姑疑郎去不歸為郎打瓦復鑽龜青
山尚有飛來日不信人無相見時完蘭石和詞花滿
蘇堤酒滿壺畫船日日醉西湖阿儂最苦兩離別不
唱黃鶯唱鷓鴣堤邊三月柳陰陰湖上春光似海深
遊人來往多如蟻半是南音半北音徐延徽和詞西
湖春草碧薦綿上有青蚨母子全夜擣守宮和血色

盡將塗上五銖錢盡說西湖好莫愁不知天上有牽
牛賸拚萬斛胭脂水瀉向銀河一色秋沈自誠和詞
儂住西湖日日愁郎船只在浙江頭憑誰移得吳山
去湖水江波一處流

西湖竹枝詞楊鐵厓倡之和之者數百家大率詠湖山
之勝人物之美而情寓于中比比一律惟李介石守
道詞云春暉堂上挽郎衣別郎問郎何日歸黃金臺
高倘回首南高峯頂白雲飛吳復見心詞云官河遶

湖湖遶城河水不如湖水清不用千金酬一笑郎恩
才重妾身輕用意稍別

元時錢唐士女曹妙清字比玉號雪齋張妙淨字惠蓮
號自然道人皆工詩章曹又善鼓琴行草皆有法度
事母孝謹三十不嫁而風操可尚張曉音律情逸而
才飄晚居姑蘇之春夢樓皆一時之淑媛也與楊廉
夫為文字友曹嘗和其竹枝詞云美人絕似董嬌嬈
家住南山第一橋不肯隨人過湖去月明夜夜自吹

蕭張詞云憶把明珠買妾時妾起梳頭郎畫眉郎今
何處妾獨在怕見花間雙蝶飛觀此二人之風致可
想矣廉夫又嘗答妙清絕句云紅牙管筆紫羅毫雪
水初融玉帶袍寫得薛濤萱草帖西湖紙價頓能高
玉帶袍者曹氏名硯其云萱草帖者狀其孝也

廉夫嘗以竹枝詞索和于崑山郭義仲義仲以吳中柳
枝答之因賦詩云吳中柳枝傷春瘦湖中竹枝湘水
秋說與錢唐蘇小小柳枝愁是竹枝愁

張光弼昱廬陵人至正時為行省左司員外卜私宅於壽安坊今之花市是也天台徐大章為之記曰杭郡民廬比輳如櫛而壽安坊當闌閭四達之衝又最囂處也浙省左司員外郎張君光弼之居在馬屋數楹甚湫隘門垣外囂塵闐如也或曰小人射利惟贏之為務乃不惡囂耳員外君日乘高車從丞相論決政事降登乎華堂粉署之間今卜私第不於爽塏是擇其何故哉君漠然不以為意方自署其楹間曰晏

居且謂一變曰傳稱晏子之居近市雖湫隘弗易也
吾居其類之願自附焉子幸為我記之吾於是知君
之所以市居者矣夫踐歷華要宅高曠而處深靚以
適其身固所宜也然地位峻絕不與人事接則耳目
不能無蔽是故晏子之居市也物之貴賤無不察而
知之方齊景公繁於刑以踊貴屨賤而景公省於刑
今君之居壽安也大官貴人布衣韋帶之士由茲坊
而東西者必叩門上謁君則攝衣出迎引賓上座與

肆議論下至閭閻之老工商技藝之流或有陳說亦必曲為之盡天下之事當無有不悉施諸有政將不止於一事之諷而已晏子相齊三君食不重肉妾不衣帛名顯諸侯數百載之下太史公聞其風采猶欲為之執鞭獨念當是時公弃其民而政在陳氏晏子於區區貴賤之事則務陳之而於國之大計則有未嘗數數然者他日乃與隣國之大夫加竊嘆焉何也張君剛簡亮達故左丞楊公提兵鎮江浙時用材畧

參謀其軍府事聲望赫然既而退處西湖之上簷衣
糲飯看書賦詩以自佚其有用之身較其風裁不知
自視晏子何如也乃今江浙之地未全歸於版圖丞
相用便宜命表授君為從事廓清之略克復之勲亦
惟一二左右是賴無或如晏子之舉其細而遺其大
也光弼罷官自號一笑居士又號可閒老人其時居
室已弊友人凌彥冲為疏募緣以輯之疏云昌黎寄
玉川子首稱洛城破屋之數間東坡題綠筠軒終比

揚州纏腰之十萬一笑居士詩名優於張籍生計劣
於陶潛囊無一錢之留家徒四壁之立若非慷慨而
多助安得輪奐之一新即欲取杜工部草堂賢何時
可辦倘葺得楊關西槐市塾今歲無憂苟物物之可
與則處處之咸宜但不至於虛文便可謂之實惠此
崢嶸事在特達心疏傳交遊皆助之其居始就當時
傳為盛事

光弼嘗作歌風臺詩云世間快意寧有此亭長還鄉作

天子沛公不樂復何為諸母父兄知舊事酒酣起舞
和兒歌眼中盡是漢山河韓彭誅夷黥布戮且喜壯
士今無多縱酒極歡留十日慷慨傷懷淚沾臆萬乘
旌旗不自尊魂魄猶在故鄉憶由來樂極易生哀泗
水東流不再回萬歲千秋誰不念古之帝王安在哉
莓苔石刻今如許幾度西風灞陵雨漢家社稷四百
年荒臺猶是開基處一日乘酣朗唱於瞿宗吉以界
紙擊卓鏗然若金石也笑曰吾死埋骨西湖題曰詩

人張員外墓足矣

張光弼西湖十律詩其一樓外湖光白渺茫樓中少婦
試新粧行年將近半百歲大醉豈能千萬場翠織舞
裙飛蛺蝶白描歌扇睡鴛鴦垂楊滿院無人到芍藥
花開日正長其二且觀神女為行雨莫問郎官應列
星芳草到門無俗駕好山終日在湖亭白鷗共戲荷
葉小黃鳥亂啼楊柳青肯信曲欄干外立晚涼吹得
酒都醒其三畫船湖上載春行日日花香扇底生蘇

小樓前看洗馬水僊祠下坐聞鶯碧桃紅杏渾相識
紫燕黃蜂俱有情惆悵繁華成逝水盡歸江海作潮
聲其四倩得名姬唱慢歌梁塵直欲下輕波西風八
月芰荷老落日滿湖鳬鴈多到手莫辭雙盞飲轉頭
又是一年過光陰只在槐柯上奈此浮生樂事何其
五百鎰黃金一笑輕少年買得是狂名樽中酒釀湖
波綠席上人傳鳳語清蛟蝶畫羅宮樣扇珊瑚小柱
教坊箏南朝舊俗憐輕薄每到花時別有情其六湖

上新泥雪漸融門前溝水暗相通裙欺萱草輕盈綠
粉學櫻桃淺淡紅暮雨欲來銀燭上春寒猶在酒尊
空青綾被薄不成夢又是一番花信風其七樓前芳
樹碧盈盈付與幽禽自在鳴堤上馬駝紅粉過湖中
人載酒船行日長鶯子語偏好風暖楊花體更輕何
恨才情被花惱獨教書記得狂名其八此日誰人肯
在家傾城滿意事繁華時非上已不為節春到牡丹
纔是花霧髻雲鬟湖上女畫輪繡轂道傍車兒童盡

唱銅鞮曲未覺人間日易斜其九外湖裏湖花正開
風情滿意看花來白銀大瓮貯名酒翠羽小姬歌落
梅身外功名真土苴古來賢聖盡塵埃韶光如此不
一醉百歲好懷能幾回其十玉局當年為寫真西施
宜笑復宜顰朝雲暮雨空前夢桃葉柳枝如故人露
電光陰千仞外魚龍波浪一番新傷心最是逋仙宅
半畝殘梅共晚春

張光弼初居楊完者左丞幕下頗有功業之思故其詩

云免胄日趨丞相府解鞍夜宿五侯家玉盃行酒聽
春雨銀燭照天生晚霞世亂且從軍旅事功成須挿
御筵花漢王未可輕韓信尚要生擒李左車又云西
樓柳風吹晚香石榴裙映黃金觴纖歌不斷白日速
微雨欲度行雲涼笑看席上賦鸚鵡醉聽門前嘶驪
驕早晚平吳王事畢羽書飛捷入朝堂及張氏擅權
光弼憤焉遂不事事以詩酒自娛其詩云一陣東風
一陣寒芭蕉長過石闌干兵消幾度曹騰醉看得春

風到牡丹蓋言時事也

元時法禁寬假士夫得以沈昵盤遊故其詩多脂粉綺
羅之態楊廉夫詩云二月皇都花滿城美人多病苦
多情一雙孔雀行瑤圃十二飛鴻上錦筍酒掬真珠
傳玉掌羹分甘露倒銀罍不堪容易少年老爭遣狂
夫作後生又云天街如水夜初涼照室銅盤壁月光
別院三千紅芍藥洞房七十紫鴛鴦繡靴蹴踘勾驪
樣羅帕垂鬟女直妝願汝康強好眠食百年歡樂未

渠央又云公子銀瓶分汗酒佳人金勝剪春花又云
金埒近收青海駿錦籠初教雪衣娘又云小洞桃花
落香雪大堤楊柳舞晴烟又如張光弼詩云玉瓶注
酒雙鬟綠銀甲調箏十指寒又云新妝滿面猶看鏡
殘夢關心懶下樓一時富貴繁華可想見矣

薩都拉天錫風流俊逸不亞鐵崖嘗有西湖絕句六首
湧金門外上湖船狂客風流憶往年十八女兒搖艇
子隔船笑擲買花錢少年豪飲醉忘歸不覺湖船旋

旋移水面夜涼銀燭小越娘低唱月生眉紫騮驕踏
落花泥二月江城雨過時拂曉市河春水滿小船多
半載吳姬惜春曾向湖船宿酒渴吳姬夜破橙驀聽
郎君呼小字轉頭含笑背銀燈待得郎君半醉時笑
將紈扇索題詩小紅簾捲春波綠渡水楊花落硯池
垂柳陰陰蘇小家滿湖飛燕趁楊花繁華一去風流
減今日橫堤幾樹鴉又次韻王侍郎遊湖詩綺席新
涼舞袖偏賞心輸與使君專螺盃注酒搖紅浪綵扇

題詩染綠烟一鏡湖光開曉日萬家花氣漲晴天湧
金門外春如海畫舫笙歌步步僊

奉化戴帥初表元宋太學生也入元不仕其湖上贈歌
者一絕有故國之思焉詩云牡丹紅紫艷陽天檀板
朱絲錦色箋頭白江南一尊酒無人知是李龜年又
陳剛中湖上感舊詩屬意畧同詩云昔日朱樓擁翠
鈿女牆猶在草芊芊東風第六橋邊柳不見黃鸝見

杜鵑

黃晉卿潛義烏人至正初為浙江儒學提舉工文章獎
引後進不喜華冶有西湖舟中詩云黃塵烏帽媿平
生對客猶稱舊姓名此事正堪三太息祇今忍負四
難并放舟乍落空濛境送酒元無窈窕聲金谷蘭亭
嗟已矣不妨時暫濯吾纓又送凌吉叟杭州教授詩
浙水西入州維杭實名都古來萬人海逐逐無賢愚
况茲百年後淳朴古不如翩翩誰家兒白馬驕路隅
春風樊樓醉一笑百斛珠亦有朱門客齊謳間吳歛

綃綺散烟霧續紛被僮奴可憐彼蚩蚩久為紅塵驅
頽俗如波瀾孰障羣流趨又如敗屋壁風雨須人扶
博士非冗官豈即無良圖當令歌舞場化作絃誦區
行矣循所務辭章信其餘春風慄別衣晴沙秀寒蘆
何以贈子行白雲不可呼聊持狂者言用比貂檐榆
劉師魯汶鄜王琦六世孫也元時占籍錢唐以文章淑
後進黃文獻公潛贈之詩云邂逅神交十載餘清風
落月幾愁予何言此日同傾蓋勝讀平生未見書天

上玉堂容可到山中金匱得長虛故多餘事宜商略
可待秋風怨索居其時有劉聲之護亦與齊名洪武
初俱祀于鄉賢祠

貢友初者貢師泰尚書族子也宣城人至正間師泰為
浙江行省叅政遂僑寓錢唐友初自上都還錢唐也
師泰贈之詩云嗣宗諸姪仲容賢客路飄零雪滿顛
曾為頌椒留子美却思戲蠟愛僧虔十年湖海三盃
酒百里溪山一釣船何日兵戈得休息敬亭春雨共

歸田友初詩才清麗但纖穠乏骨其湖上春歸詩湧
金門外柳如金三日不來成綠陰折得長條入城去
教人知道已春深吳山遊女詩十八姑兒淺淡粧春
衣初試柳芽黃三三五五東風裏去上吳山答願香
獨送戴伯貞還廣西一律云桂江烟水接瀟湘迓客
南歸路道長卷裏漫多新制作篋中猶是舊衣裳逢
人盡說官如水老我相看鬢已霜此去莫教音問斷
鴈飛今喜過衡陽叙事委曲而感慨係之出諸作之

上

張行中挽貢友初詩百年心事復誰知過海人傳俊逸
詩懶聽朝鷄全晚節慣騎官馬說當時文章自嘆無
遺蔭冰玉還看有故枝一代風流俱已矣曉星殘月
不勝悲黃金臺上草芊芊掉臂東風四十年對客半
開青白眼寫懷漫賦短長篇玉堂春夢烟雲外茅屋
秋風浙水邊惆悵清魂招不返空歌楚些淚潛然
鄧林南海人初名觀善以南昌教授擢吏部驗封主事

成祖改名林後坐法謫戍保安遇赦晚居杭州詩文
為一代所推重嘗於保安留別傅存齋詩云兩鬢西
風吹斷蓬杖藜扶病看秋容菊花渾似詩人瘦山色
不如歸興濃紫塞一盃桑落酒彤庭五夜未央鐘燕
鴻岐路東西去此後相思意萬重又春夕旅懷云萬
里東風故國情十年幾度鳳凰城衡陽鴈盡春三月
巫峽猿啼夜二更席上狂言因酒得鏡中華髮為愁
生靜觀富貴如雲轉拂袖歸來任俗爭五月十三日

入杭詩遊遍江湖未到杭不知人世有天堂六橋花
柳丹青興九陌樓臺錦繡粧北米南柴誇物產朝歌
暮宴樂時康逐臣何幸蒙寬卹到此渾忘是異鄉僦
屋里仁坊詩謫居何處好逍遙仁里深深遠市囂夜
色滿簾湖上月秋聲到枕海門潮上林鷗侶空相憶
南浦鷗羣苦見招覆載無私天地濶暫容閒散在漁
樵遊南屏不偶詩蘭珮荷裳竹籜冠清癯無奈朔風
寒飯堂鐘罷來何晚雪夜舟回興已闌俗狀塵容勞

意馬天光雲影動情瀾石頭有路終須到共聽吾師
說六觀

鍾狂客禧南海人甚有詩名成化中淮南督理漕運總
兵官平江伯陳公銳取歸幕下過杭友人招遊西湖
寄之詩鍾和曰湖光山色最宜秋君不來招也去遊
已辦蜀川千丈錦為誰今日盡纏頭萬頃西湖水貼
天芙蓉楊柳亂秋烟湖邊為問山多少每箇峰頭住
一年信乎狂客也

楊溫甫孟瑛四川鄴都人弘治十六年知杭州府時西湖民間規占者十九溫甫建議于御史車梁僉事高江銳情濬復而浮言胥動溫甫廼為文諭民曰先賢為民深弘利本特濬西湖之浸用溉上塘之田多歷歲年漸成湮廢比者鄉賢侍郎何公生長是邦習知成事著為三說辯析百端伏蒙當道俯念地方力圖濬復予又職司水土敢憚劬勞重惟湖上之園池盡是豪家之封殖一旦開毀百口怨咨民既傷心我亦

動念但今民產本昔官湖民侵于官以肥家固已干紀官取于民以復舊豈為厲民又惟上塘萬頃之田宿仰西湖千畝之水水盡湮塞田漸荒蕪利歸于數十家害貽于千萬井況古人留利物之澤豈今日啟生事之端幸相導以平心勿相搖于異說有以占產自首者原情免罪奏請除糧查得銅錢局及崇興崇善禪智等廢寺田以畝計者數千地以頃計者盈百動連阡陌間附城闡膏沃可耕標換如數況在昔湖

田皆捏報之稅于今清籍有新增之糧新增者至九
百而有奇捏報者幾八百而不足稍加查派不費更
張決不累民無患虧賦予性知執法心在利民非勢
力之可移惟鬼神之是質凡我父老率爾鄉閭蚤為
遷移無肆頑梗觀于斯文公之任怨亦劇矣迺以正
德二年二月二日興工六月十日歇役八月十九日
續工九月十二日訖事日用夫八千人銀二萬八千
七百餘兩

韓大年號東軒臨川人舉明經為仁和縣學訓導陞教諭襟懷坦率有清才文章流麗詩復俊逸而灑翰得李北海遺意誘育士子務盡恩義薦入翰林修遼金宋三史卒常作西湖十景詩蘇堤春晚云樹烟花霧遠堤沙樓閣朦朧一半遮三竺鐘聲催落月六橋柳色帶棲鴉綠牕睡覺聞啼鳥綺閣粧殘喚賣花遙望酒旗何處是炊烟起處有人家柳浪聞鶯云雨後翻空一派青蘇公堤畔繫漁舸只藏鶯鳥春聲滑不起

魚龍夜氣醒游子愛聞停玉勒佳人倦聽倚銀屏待
看三月歌喉老又見浮波絮作萍花港觀魚云湖上
春來水拍空桃花浪暖柳陰濃微翻荇帶綠千尺亂
躍萍星翠幾重洲渚此時多避鷺風雲何日去為龍
箇中縱有濠梁樂闊網深罾不汝容兩峰挿雲云屹
立亭亭入杳冥勢雄南北氣憑陵玉簪拔地三千仞
寶蓋撐空一七層天遠不聞風外鐸夜深遙禮月邊
燈何當一掃浮雲靜俯視東溟看日升三潭印月云

纖雲掃迹浪花收塔影亭亭引碧流
半夜冰輪初出海一湖金水欲鎔秋
龍宮獻壁神光吐鮫室遺珠瑞氣浮
浪說影娥池上景不知此地有僊舟
楚院風荷云翠圓紅繞戰縱橫似看
吳宮習女兵飛雪翻空雲影亂遊魚
吹浪水紋生錦裳零落香猶在銅柱
歌斜露半傾兩腋新涼驚酒醒畫船
吹送按歌聲平湖秋月云曾向湖堤
夜扣舷愛看波影弄嬋娟一塵不動
天連水萬籟無聲客在船赤壁未醒
玄鶴夢驪宮偏惱

老龍眠朗吟玉塔微瀾句長笑凌空氣浩然南屏晚
鐘云柳昏花暝暮雲生隱隱初傳一兩聲禪榻屢驚
僧入定旅牕偏惱客含情月隨逸韻升鼇嶺風遞遺
音過鳳城催散遊人罷歌舞玉壺銀箭夜初更雷峰
夕照云宜雨宜晴晚更宜西湖端可比西施霞穿樓
閣紅光繞雲捲笙歌逸韻隨山紫翠中樵唱遠樹蒼
黃外馬歸遲何人解畫瀟湘景併與漁村作二奇斷
橋殘雪云醉裏曾登白玉梯東風吹暖又成泥玉腰

蟠竦垂天閣銀色樓臺夾岼迷九井晴添新水活兩
峰濃壓宿雲低衝寒為訪梅花信十里銀沙印馬蹄
同陳緝熙泛湖詩宿雨初收見兩峰湖光如練瀉晴
空畫船載酒來天上青鳥銜花度鏡中檀板歌聲無
越女翰林詩句有唐風相逢莫惜留連飲明日誰人
拾落紅又西湖詩西出江城外烟霞隔世塵鐘聲三
竺曉花氣六橋春鷄犬桃源地笙歌閬苑賓時平得
遊賞忘却宦中身清明與友登寶峰詩江心後浪催

前浪湖上歌聲雜哭聲今日重來多感慨百年能得
幾清明

聶大年詩翰著名一時而不得預京銜或曰大年在錢
唐時嘗署桃符云文章高似翰林院法度嚴如按察
司以此見忤達官晚年被徵修史至京而卒時人比
之梅聖俞宜也其初度日寫懷詩云五十一年車下
坡又逢初度意如何牀頭漸覺黃金少鏡裏還憐白
髮多人笑能詩貧杜甫天容善飯老廉頗相知惟有

梅花在自折南枝伴醉歌又次答祖芳云幾年遠別
喜重過白首相看奈老何富貴不來真有命齒牙雖
脫尚能歌頻沽市醞消殘燭遙指天星出絳河惟有
與君情莫逆他人平地起風波嗚呼四海交游豈止
一祖芳而已哉蓋以寡合有激而云然耳劉邦彥哭
大年詩京邸淒涼寄病身俄聞鵬鳥上承塵共嗟賈
誼年華促自顧虞翻骨相屯千里音書成永訣九重
泉路隔交親傷心今夜東軒月空照先生漉酒巾

聶大年之掌教仁和也厯官九年不以家眷自隨嘗有
答內子寄衣詩云山妻憐我舊蘇秦寄得衣來穩稱
身落日故園歌白苧秋風京洛染緇塵同心意重思
偕老結髮情深不厭貧萬里不如歸去好幾多衣錦
夜行人又有諭兒輩詩云四兒五歲六兒三莫與肥
甘習口甜清白傳家無我愧詩書世業要人擔三餐
淡飯何須酒一筋黃齏略用鹽聞說有人曾餓死算
來原不為官廉覩此高風可想矣

聶大年在仁和時山西湖廣廣東廣西咸以秋闈校士
致聘大年辭不往寄之詩云名藩校藝遣徵書使者
頻頻走傳車老大難行太行路平生厭食武昌魚五
羊城古僊遊遠八桂雲寒樹影疎寄語天涯好知己
莫因詞賦薦相如

聶大年嘗賦卜算子二首益自況也詞云楊柳小蠻腰
慣逐東風舞學得琵琶出教坊不是商人婦忙整玉
搔頭春筍纖纖露老却江南杜牧之懶為秋娘賦粉

淚濕鮫綃只怨郎情薄夢到巫山第幾峰酒醒燈花
落數日尚春寒未把羅衣著眉黛含顰為阿誰但悔
從前錯馬浩瀾和云歌得雪兒歌舞得霓裳舞料想
前身跨鳳僊合作蕭郎婦顏色雪中梅淚點花梢露
雲雨巫山十二峰未數高唐賦花壓髻雲低風透羅
衫薄殘夢瞢騰下翠樓不覺金釵落幾許別離愁猶
自思量著欲寄蕭郎一紙書又怕歸鴻錯

孫太初一元號太白山人正德中流寓西湖或曰安化

王喬避亂詭姓名修髯哲面丰儀瀟灑望之宛然神
僊也詩思清逸有烟霞氣其跨驢遊西山天竺寺詩
秋葉滿林吹亂紅秋光半在山寺中老衲迎門解幽
事一見呼我長髯公薰爐相對坐終夕松聲泉韻何
冲融獨鶴隔竹向人立欲鳴未鳴幽意同氣酣日落
豪興發詩成三統青桂叢造物小兒玩人世俯仰何
必悲無窮布袍斗笠自高格狂歌醉舞驚山翁歸來
明月散林影驢背仰笑秋山空秋晚眺鎮海樓詩樓

上輕雲散女隄樓前狂客獨支頤江當夕照半添色
詩與秋山兩鬪奇木葉無言時序暮塵寰多事杖藜
知只應又被漁郎笑雨細風斜歸去遲登吳山絕頂
望江潮詩獨倚危岑岼接羅晚潮初上練痕齊亂搗
鼉鼓妖蛟舞倒捲銀山海日低弓弩千年人去後帆
檣萬里望中迷憑誰喚起眉山老為誦錢王廟裏題
西湖之改名高士湖也孫太白自序云正德乙亥孟春
十四日子與石川子泛舟西湖時石川子着方山冠


予戴華陽巾被高士服把酒四望予顧謂石川子曰
昔青蓮居士李白與尚書郎張謂泛沔州南湖因改
為郎官湖今日子與子遊頗追蹟前事西湖因可為
高士湖矣石川子大笑酌酒于湖命予詩紀之予時
已爛醉即信口長短成篇不竄易一字云我聞唐家
李白一世賢郎官之湖至今傳我今與子繼其蹟勝
事豈許昔人專方冠野服興不減駕船載酒凌蒼烟
千山萬山兩岸如羣龍蜿蜒盡在几席前青天落盃

底白日行舟邊
鼉鼉突兀波面出
大魚小魚爭避船
君把斗酒我歌扣舷
天風下來雲葉翩翩
爛醉騎鯨
遊崑崙巔

孫太白之寓西湖也與閩人鄭繼之善夫善其夢繼之
詩云不見平生鄭廣文風塵側望隔青雲殊方物色
偏憐客雨夜燈花頻夢君隔葉山鳩高自語避人江
鶴獨為羣眼中世事堪惆悵塞北音書久未聞鄭繼
之久不過湖上奉簡詩恠爾狂吟客不過湖水濱寧遭

官長罵莫待野人嗔雲外烏藤杖水邊白鷺巾相看
只自好空送月華新鄭繼之寄孫太白詩吳門往日
聽談玄塞鴈江鱗動隔年聞爾獨居水西寺與誰同
泛六橋船魚翻荇蓆錦不亂鳥下蘼蕪青可憐擬把
卽筒共梅蕊兼程定得小春天又云為問山人孫太
初交情歲晚莫教疎孤山梅萼春相惱滿地松苓日
自鋤江夏肯容櫪處士茂陵初卧馬相如知君不廢
茗溪釣書帛能無寄鯉魚西湖過孫山人舊隱詩荒

迷更踏西湖路露舄雲裳空六橋涕淚翻悲竹林宴
笛聲月色傍中宵醉歌亂詫魃龍出此地曾傳麟鳳
標今日孤山最孤寂梅花桂樹更蕭條



西湖遊覽志餘卷十一

欽定四庫全書

史部

西湖遊覽志餘卷十三

詳校官太僕寺少卿臣李廷欽

編修臣程嘉謨覆勘

總校官編修臣王燕緒

校對官中書臣葉蘭

謄錄監生臣孫廷璧

欽定四庫全書

西湖遊覽志餘卷十二

才情雅致

明 田汝成 撰

羅昭諫隱新城人博物能詩唐昭宗時遊京師不遇歸
謁武肅王辟為錢唐令尋掌書記時鏐初授鎮海軍
節度命沈崧草謝表盛稱浙西繁盛成以示隱隱曰
是自賈征索也請更之乃極言兵火凋弊有天寒而

麋鹿來遊日暮而牛羊不下之語廷臣見之曰此羅
隱詞也又賀昭宗更名昶表曰左則姬昌之半字右
則虞舜之全文京師稱為諸鎮第一云然性傲睨好
議評臧否探隱命物往往奇中故至今杭人稱前定
不爽者猶云羅隱題破也

潘道遥閬錢唐人以詩名宋太宗將官之辭不就與王
繼恩善繼恩敗捕之遁弗得咸平初京尹收繫之真
宗赦其罪以為滁州叅軍卒於泗上初閬在錢唐與

道士馮德之約歸骨於天柱山德之囊其骨歸塋焉
閻與王元之孫何柳開魏野最厚暇則放懷湖山隨
意吟咏人目為謫仙云嘗有錢唐晚歸詩一首祖無
擇以為不減劉長卿也詩云久客見華髮孤棹桐廬
歸新月無私照落日有餘輝漁浦風水急龍山烟火
微時聞沙上鴈一一背人飛又有過華山詩云高愛
三峰插太虛帚頭吟望倒騎驢旁人大笑從他笑終
擬移家向此居好事者畫為圖魏野贈詩云昔賢放

志多狂怪若比而今總未如從此華山圖籍上又添
潘閬倒騎驢又夏日宿西禪院詩此地絕炎蒸深疑
到不能夜涼知有雨院靜似無僧枕潤連雲石牕明
照佛燈浮生多賤骨時日恐難勝蘇子瞻深喜之

沈文通邁錢唐人皇祐初舉進士後知杭州疎雋博達
明於吏治令行禁止以公錢嫁民間孤女數百人倡
優養良家子者奪歸其父母善遇僚屬皆甘心為之
耳目刺閭巷長短嘗禁捕西湖魚鼈故人居湖上蟹

夜入其籬適會客食之旦詣府邁迎語曰昨蟹美乎
客驚謝嘗鑿井引湖水以便民至今稱沈公井其送
施密守錢唐詩云塞外風烟河上塵歸來始覺二毛
新承明自厭頻趨直滄海還思一濯巾幕府旌旗初
壓境畫船歌吹便行春湖山滿目舊遊在何日從公
醉紫萸所著有西溪集

沈睿達遼邁弟也趣操高爽能詩王安石甚重之有風
流謝安石瀟洒陶淵明之稱坐法流池州得九華秋

浦間喜曰使我自擇不過爾耳築室齊山名曰雲巢
所著有雲巢編蘇黃皆與倡和

沈存中括邁從父也舉進士編校昭文書籍定三歲郊
丘之制考渾儀景表五壺浮漏造新厯募天下上太
史古書神宗稱善忤蔡確出知延州募軼羣之士得
徹札超乘者千餘時朝廷出宿衛兵戍鎮賞賚至再
而不及鎮兵括以為衛兵雖重而無歲不戰者鎮兵
也賞不均且召亂乃藏勅而矯制賜緡錢以驛聞詔

報嘉之括博學善文而喜詆諧劉貢父嘗詣之值括
澡體盆中便慟哭括驚問故貢父曰死矣盆盛括括
亦大笑所著有長興集筆談

闕子淵沼杭州人元祐間為翰林學士將辭歸隱士孔
夷贈之詩云吳越聲飛二十年緇衣空復歎遺編紫
芝眉宇風塵外太白文章錦繡前可是石渠方載筆
未應水國要歸田他年雪裏相逢處能記騎驢孟浩
然其清標絕俗如此

強幾聖至錢唐吳山里人刻苦攻詩韓魏公甚重之所
著有祠部集其戲贈賈麟自睦來杭將復如蘇詩春
風那解繫狂遊朝醉桐江暮柳州大手千篇隨地掃一
身四海學雲浮榮名不落閒宵夢退築聊為晚歲謀
老橘殘鱸猶有興片心歛起洞庭舟

周美成邦彥錢唐人疎雋少檢不為州里推重而博涉
百家元豐初遊京師獻汴都賦神宗奇之累官徽猷
閣待制提舉能自度曲製樂府長短句詞韻清蔚名

其居曰顧曲堂其所製意難忘云衣染鶯黃愛停歌
駐拍勸酒持觴低鬟蟬影動私語口脂香簷露滴竹
風涼拚劇飲淋浪夜漸深籠燈就月仔細端詳知音
見說無雙解移宮換羽未怕周郎長顰知有恨貪耍
不成粧些個事惱人腸試說與何妨又恐伊尋消問
息瘦減容光其詞格大率類此

美成晚歸錢唐夢中得瑞鶴仙詞一闋云悄郊原帶郭
行路永客去車塵漠漠斜陽映山落斂餘紅猶戀孤

城欄角凌波步弱過短亭何用素約有流鶯勸我重
解繡鞍緩引春酌不記歸時蚤暮上馬誰扶醒眠朱
閣驚飈動幕猶殘醉遶紅藥嘆西園已是花深無地
東風何事又惡任流光過却歸來洞天自樂未幾方
臘亂自桐廬入杭時美成方宴客倉皇出奔趨於西
湖墳菴適際殘冬落日在山忽逢故人之妾奔逃而
來乃與小飲於道旁旗亭聞鶯聲於木杪少焉分背
抵菴尚有餘醺困卧小閣之上恍如詞中所云逾月

入城故居皆遭蹂踐矣後得請提舉洞霄宮而終老焉

白廷玉珽錢唐人博綜經史所著有湛源集方回劉辰翁稱其詩逼陶韋書逼顏柳嘗著西湖賦二首考據精核其湖樓玩雪詩上湖十里捲簾中幻出瑤華第一宮山勢蹴天銀作浪柳行撲地玉為虹漁蓑鶴氅同為我雀舌羊羔不負公明日鳳城朝退蚤一鞭曾約試吟驄湖居雜興詩御舟初出賞春菲傳是諸王

與后妃香霧漸深簾幕暗日斜惟見淡黃衣脉脉吹
香屋角梅背風移燭小簾開鳳城幾日元宵近一片
簫聲水上來龍舟曉發斷橋西別有輕舟兩兩隨春
色可人晴較穩酒家爭出柳梢旗相國平泉水竹居
吳山花石世間無遊人馬上休回首一半春風在裏
湖雨後林深夏亦秋一葫蘆酒在船頭醉來深入荷
花去卧看青天飛白鷗三賢猶得仰高風冠服雖殊
氣味同後五百年無繼者桃花含笑夕陽中車魚人

散水風腥雨色涼分柳外晴回首夕陽都落盡忽然
東向數峰明萬樹芙蓉兩蕊宮秋風開遍水邊叢白
牆遮盡紅牆出只見紅牆一半紅酒邊贈朱處士詩
烏葛唐巾白苧裘掃庭終夕共淹留醉中談論心猶
壯老去歌歡淚亦流對客呈詩如獻佛課兒收橘當
封侯明年好理西風櫂重約三吳爛漫遊

葉太白李錢唐人或曰富陽人賈似道當國時行公田
關子兩法民間苦之李上書力詆且獻鈔式以代關

子似道怒黥流嶺南及似道敗赦還而似道亦有漳
州之謫相值於途太白贈之詞云君來路吾歸路來
來去去何時住公田闕子竟何如國事當時誰與誤
雷州戶崖州戶人生會有相逢處客中頗恨乏蒸羊
聊贈一篇長短句宋亡八元上書獻鈔式世皇嘉納
遂為至元鈔仕至中書左丞

錢思復惟善錢唐人博學能文章以浙潮賦起名其首
句云維羅刹之巨江兮實發源於太末試官嘉之遂

中選蓋其時滿場無知羅刹為浙江者後作西湖竹
枝詞十首有云阿姊住近段家橋瞿元範戲之云此
段家橋創見却與羅刹江不同也瞿宗吉嘗盡和之
云昨夜相逢第一橋自將羅帶繫郎腰願郎得似長
江水日日如期兩度潮又云裏湖外湖波渺茫兩岸
人家多種桑採桑不怕霧露濕惟願朝朝逢着郎大
為思復獎許張氏據吳遂不仕退居吳江筒川與楊
廉夫倡和有句云笠澤水寒魚尾赤洞庭霜落樹頭

紅又云漢史丁公却及齒陶詩甲子不書元蓋感時事也

葉居仲廣居仁和人天資超邁才力絕人仕至浙江儒學提舉築室西泠橋陶情詩酒所著有自得齋集自題隱居詩癭木栽冠鶴髦輕十年塵土厭飄零小山舊隱雲封戶大藥新成月滿庭丹井夜交龍虎氣碧霄春躡鳳凰翎西風客舍炎歎淨擬讀琴心內景經仇仁近遠號山村錢唐人元初為溧陽州儒學教授工

詩文一時遊其門者若張雨張翥莫維賢皆有名當時所著山村集洪武初祀於杭學鄉賢祠其湖上值雨詩波痕新綠草新青有約尋芳苦不晴莎徑泥深雙燕濕柳橋烟淡一鶯鳴山園故苑春常鎖泉落低畦暖未畊十載舊踪時入夢畫船多處看傾城同段吉甫泛湖詩西湖春碧淨無泥畫舫朱簾傍岸移寒食清明初過後杏花楊柳乍晴時從教西日催歌鼓莫放東風轉酒旗只恐明朝成雨去暗驚濃綠上高

枝同陳彥國泛湖詩斜堤高柳綠連天且繫閒人書
畫船花事已空三月後湖光還似百年前洛陽園囿
惟詩在江左英雄托酒傳亦欲扣舷歌小海恐驚沙
上白鷗眠陪戴祖禹汎湖分韻得天字詩冉冉夕陽
紅隔雨悠悠野水碧連天山分秋色歸紅葉風約蘋
香入畫船鐘鼓園林已如此衣冠人物故依然當歌
對酒腸堪斷倒着烏巾且醉眠和韻胡希聖湖上詩
曾識清明上巳時懶隨蜂蝶步芳菲梨花半落雨初

歌杜宇不鳴春自歸雙塚年深人祭少孤山日晚客
來稀江南尚有餘寒在莫倚東風褪絮衣連作湖山
五日遊沙鷗慣識木蘭舟清明寒食荒城晚燕子梨
花細雨愁賜火恩榮皆舊夢禁烟風景似初秋鳳絲
龍竹繁華意猶為西林落日留秋日西湖園亭詩西
湖一曲百泉通漠漠青山遶梵宮故國園林秋色淨
明朝風雨桂花空銀笙玉笛清歌外畫舫朱簾落照
中人物風光兩相稱兒童遮莫笑山翁陸靜復為園

詩連轡行春自作期尋芳却笑我來遲三盃雲液花
前酌一曲瓊簫竹下吹滄海桑田非舊日石泉槐火
有新詩山中道士閒於鶴門外紅塵總不知閒居絕
句詩堦前紫蔓金絲草籬角紅垂錦帶花梓澤平泉
易消歇春留富貴與詩家茶甌紗帽慣迎賓不是詩
人即道人細雨斜陽君莫出綠陰門外有紅塵

高孟升得賜錢唐人洪武間以文學薦授臨安學教諭
陞高州學教授永樂初召為宗人府經歷纂修大典

為副總裁記聞博洽詩文純雅名重一時所著有節
庵集嘗作錢唐十景詩西湖夜月云共說西湖天下
景秋來有月更奇哉寒波拍岸金千頃灝氣涵空玉
一杯桂子遠從雲外落藕花多在露中開酒船清夜
乘清興絕勝笙歌日往來浙江秋濤云秋滿吳天八
月中潮頭萬丈駕西風雲驅蛟蜃雷霆鬪水擊鯤鵬
渤澥空自古江山誇壯麗至今父老說英雄諸溪近
海徒相應氣勢那能與此同孤山霽雪云山頭白白

六花鋪水面青青一髻孤翠鳳搏雲朝貝闕玉樓擎
日出冰壺梅花正好衝寒探竹葉何妨踏凍沾千載
林逋留勝迹總因佳境在西湖兩峰白雲云西湖之
上兩奇峰高入太虛雲氣中華蓋漸迷青縹緲浮圖
時見碧玲瓏陰連海眼龍歸洞影散天心鶴繞空幾
度登臨舒遠眺英英佳氣盪吟胸東海朝暾云一道
長江接海門扶桑影動浴朝暾銅盤迴立仙人掌金
柱中撐玉女盆出水赤鳥銜火躍隨潮白馬挾雷奔

負暄亦有磯頭老欲効微芹獻至尊北闕夜市云北
城晚集市如林上國流傳直至今青亭受風搖月影
絳紗籠火照春陰樓前飲伴聯游袂湖上歸人散醉
襟闌闌喧闌如晝日禁鐘未動夜將深九里雲松云
喬松萬樹總良材九里青雲一逕開雲氣直從天竺
去濤聲長傍海門來人行道上依濃樾子落僧前點
嫩苔山水清暉增偉觀托根元不愧徂徠六橋烟柳
云畫橋六曲繞湖頭最愛晴烟柳上浮淺水籠寒橫

晦靄微風熏暖弄輕柔金梭隱見聞黃鳥錦纜縈紆
出綵舟徧倚赤闌頻注目為憐張緒舊風流靈石樵
歌云靈石塢頭樵逕連羣樵唱和石頭前猿啼鶴唳
清相似野調山腔近自然木杪緣厓通窈窕竹根濯
澗雜潺湲白雲過處清風發吹入長松勝管絃冷泉
猿嘯云冷泉亭外松千樹時有老猿啼樹間逐侶出
雲風動壑呼兒歸洞月橫山曉空蕙帳人初去秋入
荷衣客未還清響不同巴峽怨時時嬾嬾和潺潺和

貢友初西湖詩佳趣誰全得閒情自軼羣買舟聽夜
雨立馬看春雲酒伴期相共詩題得屢分西湖天下
景坡句昔曾聞約人遊湖詩明日湖中去先期問畫
船分醪開鴈棧裏茗試春泉知己能胥會同心托就
延段家橋畔柳拂曙看鶯遷

高孟升晚春曲香雨飄紅換新綠雛鸞怨咽參差玉畫
闌墜露泣殘妝遠翠愁山蛾黛感勞勞乳燕說烏衣
海天凝雲烟草迷東流苦長西日短惆悵花前鷓鴣

卮繡幕深沉雨聲小夢入神山良夜悄鏡裏韶華又
一年曲渚鷄鳴錦屏曉瞿宗吉春曉曲子規啼罷東
方白香露寒凝海棠魄帳捲流蘇夢乍醒妝臺試點
宮梅額鶯儔燕侶乘風來隔林巧語傷幽懷金錢買
花不論價俏枝斜插雙頭釵瞳瞳紅日射牕牖暝霧
如烟薰翠柳鞦韆嫩蹴綵繩間滿頰胭脂中卯酒二
篇詞調俊逸風致可想也

凌彥翀雲翰仁和人博通經史領至正十九年鄉薦除

平江路學正不赴作梅詞霜天曉角一百首柳詞柳
梢青一百首號梅柳爭春韻調俱美洪武初舉杭州
府學訓導陞成都府學教授卒所著有柘軒集其南
山飛流亭詩山溜泠泠來不竭激成飛瀑散空明虹
霓下飲秋無際河漢西流夜有聲橫劍誰思仙子過
作亭人羨老僧清平生慣誦天台賦不記香爐記赤
城重過柳洲寺詩買花載酒憶當年風景依稀最可
憐彭澤有人歸栗里海波何處變桑田聯拳鷺立枯

荷雨寂寞鴉棲古樹烟幾度湧金門外望居民猶說
總宜船西湖漁者詩家住錢唐西子湖釣竿幾度拂
珊瑚扁舟載月歸來晚不覺全身入畫圖

洪武庚申冬彥紳為人題鍾馗圖云朔風吹沙目欲眯
官柳搖金梅綻藥終南進士倨然起束帶藍袍靴露
趾手掣硬黃書一紙若曰上帝錫爾祉蝟磔于思含
老齒頤指守門荼與壘肯放妖狐搖九尾一聲爆竹
人盡靡明日春光萬餘里題罷掀髯自得不數日辟

書臨門迫脅上路到京竟有成都之行遂成詩識在
任以乏貢舉謫南荒卒歸骨西湖瞿宗吉作詩送之
云一去西川隔夜臺忍看白壁墜蒼苔酒朋詩友凋
零盡只有存齋冒雨來

楊復初築室南山以村居為號凌彥紳以漁家傲詞壽
之云采芝步入南山道山深宛似蓬萊島聞說村居
詩思好還被惱蒼苔滿地無人掃載酒亭前松合抱
客來便許同傾倒玉兔已將靈藥搗秋意早月華長

似人難老復初和詞云當時承望求仙道那知薄命
如郊島留得殘生猶自好多懊惱塵緣俗慮何時掃
子已成童無用抱醉眠任使和衣倒今歲砧聲秋未
搗涼風早看來只恐中年老瞿宗吉和詞云喜來不
涉邯鄲道愁來不竄沙門島惟有村居閒最好無事
惱苔階竹徑頻頻掃有酒可斟琴可抱長年擬看三
松倒白內靈砂親自搗歸隱早朝廷未放玄真老宗
吉既和此詞而復序云舊譜皆以仄聲起歐公呼范

文正為窮塞主首句所謂塞上秋來者正此格也他
如王荊公之平岍小橋千嶂抱周清真之幾日春陰
寒惻惻謝無逸之秋水無痕清見底張仲宗之釣笠
披雲青嶂遶亦皆如是今二公皆以平聲易之特著
此以俟知音爾

彥壯作無俗念詞云等閒屈指算今來古往誰為英傑
耳目聰明天賦予怎肯虛生虛滅去燕來鴻飛鳥走
兔世事何時歇風波境界大川不用頻涉空踏遍萬

戶千門五湖四海一樣中秋月
正面相看君記取全體本來無缺
空裏非空夢中真夢莫向癡人說
須騎鶴夜深朝禮金闕又蝶戀花
詞云一色杏花三百樹
茆屋無多更在花深住
旋壓小槽留客醉舉杯忽聽黃鸝
語醉眠看花花亦舞
風妬殘紅飛過隣牆去
恰似牧童遙指處
清明時節紛紛雨
詞格清逸一洗鉛華
非駢金儷玉者比也

莫景行維賢錢唐人雅尚標致
築別業于靈竺之間繞

栽杏樹號曰杏園日與騷人墨客遊詠其中時人比
之輞川庄也黃潛詩云旋移小隱傍南峰遠有咸平
處士風山態近人猶偃蹇湖光無雨亦溟濛行春杖
履時時到臨水軒窓面面通別作新亭供戲劇青帝
搖曳杏花中張輿詩云文園近日復何如杏樹莊頭
好隱居塵隔不知城市熱門開只見稻麻疎碧窻清
晝閒評藥綠樹涼風獨枕書喜得江村殘暑退拏舟
擬欲到行廬洪武初曾為杭庠訓導所著有廣莫子

稿其祖凝少真人者前元時高士也卒葬棲霞嶺虞
邵庵為之碑記張行中為之賦詩云相國流芳到棣
華隱居湖上對棲霞清連後澗神仙境幽勝孤山處
士家華表秋宵空落月杏莊寒食幾飛花如今獨有
雙碑在人物俱非重可嗟

潘時雍錢唐人簡淡力學詩句脫塵號灌園生徐一夔
為之序曰錢唐潘時雍讀書賦詩廉介自將視當世
富貴雖非不願欲者使其脂韋取容以僥倖一時寧

貧賤而肆志郡城之東二百步而近有地十餘畝古井一區宋輦院基也入於居民久矣荒棄弗治暇日過見之徘徊相度曰是豈不足為吾生乎既而購得之除治一畝為廬用其餘地析而為畦縱橫數十塍茹菜若干品天稍不雨輒置桔槔井上俯前仰後聲軋軋如龍鳴出井水以灌已則攝弊衣履循行畦間顧見菜色青青若綠雲覆地喜曰生意若此足矣掇其脆美為其父母妻子供具而斥其餘賣諸市中自

以為常不輟或曰錢唐陸海之府魚鹽蜃蛤之所產
羽草竹箭之所生象犀珠玉之所聚街居之民用貧
求富千金為母則子百金百金為母則子千金萬金
若此者家相望也又其地為元行省丞相治所往時
承平丞相守法而已今天下多故丞相承制得自爵
祿人卜醫衆技苟有以自見不必去妻子違父母跋
涉遠道輒致位顯要紆金曳紫翱翔康莊之衢中世
以降道德之意泯矣惟聲與利可以驚動世俗子年

甚富又居聲利之場不為彼以取寵榮顧乃為此何
哉時雍曰嘻夫尺有所短寸有所長彼所能者我則
不能吾亦豈能枉吾之性以我所不能為彼之能故
寧自附于農家者流使人稱之曰灌園生灌園生不
辭也嗟夫習俗之移人也久矣自今以往錢唐之人
不尚貨殖而尚德義不尚奔競而尚恬退不自時雍
始乎余因序其出處以為趨附聲利者勸焉時雍嘗
為一夔賦獨樹軒詩瀟洒幽軒面水開軒前老樹倚

雲裁閒來倚杖過三匝醉後支頤看百迴風雨欲隨
龍化去雲霄常聽鶴飛來結隣擬共榮枯事遮莫人
知是散材

張行中與仁和槎溪人洪武初上書論時務稱旨授刑
部主事詞翰清麗弟行素輅咸有文名兄弟友愛所
著有聯輝集行世秋日湖中詩風波千頃畫船開吹
近芙蓉影裏來倒捲綠霞翻舞袖斜飛白雨溢行杯
總宜園冷花無主蘇小墳空草作堆為倩金戈揮落

日秋聲莫向樹頭催湖上分韻得香字詩晴麓雲橫
萬里長出門步步是春光近湖酒閣多紅杏隔岬漁
家盡綠楊簫鼓聲寒心自醉綺羅魂冷骨猶香漫遊
不是矜年少贏得閒情似洛陽約可閒老人訪玉藥
圃詩明朝寒食風日晴可閒欲同湖上行先拾玉壺
園上翠却聽瑤石山前鶯茶鐺煩為試新火杏酪不
須和冷餠君若肯將花逕掃日高相與到柴局次韻
元宵詩月到中宵午漏深青衫羅薄露華侵鰲浮仙

島春無際人下歌樓醉不禁大地金蓮分夜色上方
玉燭慰民心歸來更有傳柑宴坐列宮釵十二金闈
王立本江上觀潮詩兩月竟違王翰面近聞無事看
胥濤鳳凰相對暮雲合牛馬平分秋水高望去波瀾
接天宇坐令霜雪侵髭毛江臯賴有逯文學應與論
詩對濁醪江潮詩羅剎江頭八月潮吞山挾海勢雄
豪六鼇倒捲銀河濶萬馬橫奔雪嶂高自是乾坤通
氣脉應非神物作波濤吳兒弄險須臾事坐看平流

濟萬艘行素次韻王志道元夕感興詩沉水香生寶
篆烟九衢車馬正喧闐金蓮徧燭三千界銀甲誰彈
五十絃天上樓臺春盎盎人間風月夜娟娟少年行
樂情懷異絳蠟籠紗六轡聯

逯西臯者元左丞魯曾孫也占籍錢唐工文翰有雅趣
仕行省都事內附後棄官居西湖八十五歲卒張行
中嘗贈之詩云無官貧亦樂有暇趣偏寬身世雙蓬
鬢功名一釣竿透窻蟾影淡落枕鴈聲寒猶恐梅開

早扶筇雪裏看又云冠製黃楊窄巾裁皂葛寬仙衣
新鶴氅吟杖小龍竿日短棋消暇風高酒禦寒興來
書數紙揮子已能看又八十古難能風流事慣曾醉
防醒眼怒老畏少年憎鶴髮垂寬領鰕身倚瘦藤笑
談殊未倦把酒勸山僧子宏洪武初選補杭州府學
生從徐大章年十八陳時政得失高皇帝悅之試秋
柳賦稱旨吏部奏宏年少賜歸卒業尋以鄉貢歷教
松江武進宏子端舉進士官刑部員外郎永樂中扈

從北征死於戰

瞿宗吉佑錢唐人學博才瞻風致俊朗少不為其父所知鄉人張彥復自福建檢校回家瞿翁殺雞具酒待之宗吉年十四適自學舍歸彥復指雞為題命賦之宗吉應聲云宋宗憲下對談高五德聲名五彩毛自是范張情義重割烹何必用牛刀彥復大加稱賞手寫桂花一枝并題其上以贈云瞿君有子早能詩風采英英蘭玉姿天上麒麟元有種定應高折廣寒枝

瞿翁遂構傳桂堂而凌彥冲丘彥能吳敬夫咸鄉丈
與為忘年友一日楊廉夫訪之出所作香奩八詠以
示宗吉宗吉悉和之其花塵春跡云燕尾點波微有
暈鳳頭踏月悄無聲黛眉顰色云恨從張敞毫邊起
春向梁鴻案上生金錢卜歡云織錦軒牕聞笑語採
蘋洲渚聽愁吁香頰啼痕云斑斑湘竹非因雨點點
楊花不是春廉夫嘆服曰此瞿家千里駒也洪武中
以薦舉授臨安學訓導累陞周府長史所著有存齋

集

永樂間宗吉以詩禍下錦衣獄盱江胡子昂亦以詩禍
踵至子昂以東坡係御史臺獄二詩索瞿和瞿詩云
一落危塗又幾春百憂交集未亡身不才棄斥逢明
主多難扶持望故人有字五千能講道無錢十萬可
通神忘懷且共團欒坐滿炷爐香說善因酸風苦霧
雨淒淒愁掩園扉坐榻低投老漸思依木佛受恩未
許赦金雞艱難饋食憐無母辛苦迴文賴有妻何日

湖船載春酒一篙撐過斷橋西已而宗吉謫戍保安
者十年時興和失守邊境蕭條永樂己亥降佛曲於
塞下選子弟唱之時值元宵宗吉淒然作望江南五
首云元宵景野燒照山明風陣摩天將夜半斗杓插
地過初更燈火憶杭城元宵景巷陌少人行舍北孤
兒偎冷坑牆東嫠婦哭寒檠士女憶杭城元宵景刁
斗擊殘更數點夕烽明遠戍幾聲寒角響空營歌舞
憶杭城元宵景默坐自傷情破竈三盃黃米酒寒牕

一盞濁油燈宴賞憶杭城元宵景淡月伴疎星戍卒
抱關敲木柝歌童穿市唱金經簫鼓憶杭城

宗吉西湖秋泛滿庭芳詞露葦催黃烟蒲駐綠水光山
色相連紅衣落盡辜負採蓮船點檢六橋楊柳但幾
箇抱葉殘蟬秋容晚雲寒鴈背風冷鷺鷥肩華筵容
易散愁添酒量病減詩顛況情懷冲澹漸入中年掃
退舞裙歌扇盡付與一枕高眠清閒好脫巾露髮仰
面看青天又西湖四時望江南詞西湖景春日最宜

晴花底管絃公子宴水邊羅綺麗人行十里按歌聲
西湖景夏日正堪遊金勒馬嘶垂柳岼紅粧人泛採
蓮舟驚起水中鷗西湖景秋日更宜觀桂子岡巒金
粟富芙蓉洲渚綵雲間爽氣滿山前西湖景冬日轉
清竒賞雪樓臺評酒價觀梅園圃訂春期共醉太平
時

宗吉平日著作散亡者蓋不少也暇日得其逸稿律詩
近體共十五篇錄以自適題則天故內詩堪恨當年

武媚娘手持唐璽坐明堂不思仙李方三葉却愛蓮
花似六郎廢苑荆榛來雉兔故宮禾黍沒牛羊尚餘
數仞頽垣在遙對龍門山色蒼秋日書懷詩五窮何
日是歸年幾費奴星結柳船善價誰求司馬賦癡心
欲借尉遲錢六通未具難成佛九轉無疑漫學仙一
事尚為今日幸免供徭役為無田暮春書事詩過牆
新竹翠交加綠樹陰陰噪乳鴉花到酴醾香結局鳥
鳴鶗鴂客思家煮茶湯沸風聲轉夢草詩成日影斜

零落殘紅青子滿
漸看金彈熟枇杷
睡起呼童掃落花
石泉槐火試新茶
樹林深處蜂王國
簾幙陰中燕子家
柳絮乘風投硯水
竹枝搖影落牕紗
幽居莫道無官况
鼓吹猶存兩部蛙
旅舍書事詩過却
春光獨掩門
澆愁漫有酒盈尊
孤燈聽雨心多感
一劍橫空氣尚存
射虎何年隨李廣
聞雞中夜舞劉琨
平生家國縈懷抱
濕盡青衫總淚痕
茆屋三間白板扉
棲遲四壁嘆多違
揚雄投閣功名薄
王粲登樓事業非
白

晝夢回梁燕語青天目送塞鴻歸東門黃犬華亭鶴
舉世無人悟此機清明即事詩風落梨花雪滿庭今
年又是一清明游絲倒地終無意芳草連天若有情
滿院曉烟聞燕語半牕晴日睨蠶生鞦韆一架名園
裏人隔垂楊聽笑聲夜涼詩瀟瀟木葉打窻扉又送
新涼入敝帷煥不及時秋後雨淡而有味客中詩還
家自愧蘇秦婦交友誰知蔡克兒不寐起來搔首坐
繞庭促織替人悲題伍胥廟詩一過鼗祠淚滿襟英雄

自古少知音江邊敵國方嘗膽臺上佳人正捧心入
郢共知讐已雪沼吳誰識恨尤深素車白馬終何益
不及陶朱像鑄金有感詩世事年來似奕棋可堪歲
月去如馳肉生髀骨英雄老金盡牀頭富貴遲蹈海
莫追天下士折腰難事里中兒可憐滿眼新亭淚對
泣無人只自悲夏晚納涼詩竹牀藤簟晚涼天卧看
星河小院偏雲影恰如衣暫薄月華那得扇長圓清
泉冷浸冰盤果嘉樹香籠寶鼎烟想是高樓風更爽

玉人間按十三絃清明賦絕句詩兼旬蹭蹬在京華
又見東風御柳斜客裏不甘佳節過借人亭館看梨
花池河道中詩牽牛花碧豈花黃血色蜻蜓點水忙
人在漁村斜照裏數聲短笛隔垂楊齋居觀物詩蕉
葉陰陰艾葉香菖蒲苗短菊苗長夜來知有蝸牛過
一道銀光在粉牆出巢新燕傍簾帷乳鴨浮沉水滿
陂葉底青蟲時節至化為蝴蝶上花枝

宗吉風情麗逸見之詩篇者往往有歌扇舞裙之興金

公素謂之司空見慣者誠然也夏時正修杭州府志
獨不錄其詩詞而白蘇楊薩俚紅倚翠之篇悉皆裒
採豈非貴耳而賤目者哉宗吉嘗著剪燈新話一編
粉飾閨情假託冥報雖屬情妖麗遊戲翰墨之間而
勸百諷一間有可采或謂秋香亭記乃宗吉事使其
果然亦元微之會真意也桂孟平讀此書而作歌一
篇語涉諷刺而思致穠縟可誦也其詞云山陽才人
疇與侶開口為今闔為古春以桃花染性情秋將桂

子薰言語感離撫遇心怵怵道是無憑還有憑沉沉
帳裏晝吹笛煦煦窓前宵剪燈條而晴兮忽而雨悲
欲啼兮喜欲舞玉簫倚月吹鳳凰金柵和烟鎖鸚鵡
造化有跡尸者誰一念纔萌方寸移善善惡惡苟無
失怪怪竒竒將有之丈夫未達虎為狗濯足滄浪泥
數斗氣寒骨聳錚有聲脫幘目光如電走道人青蛇
天動搖不斬尋常花月妖茫茫塵海漚萬點落落雲
松酒半瓢世間萬事幻泡爾往往有情能不死十二

巫山誰道深雲母屏風薄如紙鶯鶯宅前芳草樓燕
燕樓中明月低從來松栢有孤操不獨鴛鴦能並棲
久在錢唐江上住厭見潮來又潮去燕子銜春幾度
回斷夢殘紅落何處還君此編長嘯歌便當酌以金
巨羅醉來呼枕睡一覺高車駟馬遊南柯

宗吉漫興詩云自古文章厄命窮聰明未必勝愚蒙筆
端花與冑中錦賺得相如四壁空蓋有激而云然也
又書生嘆云書生嗜書被書惱居不求安食忘飽微

吟朗誦無了期妻怨兒啼隣里誚東家郎君狐白裘
終宵醉眠寶釵樓西家壯士金鎖甲萬里勇斬樓蘭
頭堆金積玉誇豪貴眼底何曾識丁字休言富貴有
危機信知文字真愁具從今投筆復棄書擬學東臯
農把鉏妻復苦諫兒揺手近來差科重田畝其感時
傷事抑又甚焉馬浩瀾感其詩作畫堂春詞云蕭條
書劍困埃塵十年多少悲辛松生寒澗背陽春勉強
精神且可逢場作戲寧須對客言貧後來知我豈無

人莫漫沾巾乃今瞿馬之名照耀文苑當年牢落安足嘆耶

王希範洪仁和人永樂間年十八舉進士授行人入翰林檢討與修永樂大典為副總裁陞侍講主考禮闈時胡文穆公總裁國史希範因言其書徵處士胡祺於五星聚奎之下若以其祥為祺發者公為祺子疑有私焉且國家文明正不藉此為重文穆公從之而心憾其言尋改禮部主事部之長缺詔洪署部印練

習稱旨詔作佛曲序洪逡巡不敢應制遂為同列所
排不復進用晚得末疾卒著作多散落不存存者殺
齋存稿其遊西湖詩紅蓮白蓮開滿湖小娃唱歌間
且都故人相會能幾度美酒何妨傾百壺雙拳藏闥
握松子萬錢賭勝賽樗蒲暮歸酩酊白馬上誰識山
翁非酒徒夏日間居詩綠竹蒼松引夏涼方塘曲沼
藕花香兩峰獨對空山靜一鳥不鳴清晝長春得細
糧如玉子釀來新酒勝瓊漿人生快意能如此何用

荒唐入醉鄉

陳士寧仁和人涉獵書史喜賓客與同邑鄭璧夏誠交
莫逆如兄弟然皆好吟詠時時同棹湖中狎玩魚鳥
蓄古法書名畫彝器相過品鑒有通家好士寧之母
與璧之母皆高年奉之均為子行母歿互服緦麻士
寧居鹽橋七寶巷中又徙獨山全斯立贈之詩云青
字營西小巷幽衡門寂寂思悠悠一生清事無間日
夾徑黃花滿院秋賣帖偶逢官巷口評詩共宿獨山

頭誰知擾擾紅塵裏荷蕢行歌得自由張輅詩云橫
溪別業錦雲鄉紅白蓮花薜荔牆百事不關心獨靜
孤雲無着興偏長佳人雪藕供微醉童子分茶坐晚
涼如此好懷誰解寫詩成還讓孟襄陽

桂孟平衡仁和人洪武中為錢唐學修業齋訓導遷山
東轉谷府奉祀卒於長沙所著紫薇稿其送王惟中
代屠先生詩秋來忽得桂衡書又報王郎去聽除若
有鄉情須記我便生官況也從渠山中歲月三邊鴈

客裏餐飧兩饌魚此去上林方校獵要因奏賦識相
如蘇李泣別圖詩我生自恨不如死君死誰知更得
生十九年前今日淚都無一點為功名九日陪陳廣
文貢有道遊伏龍岡新庵詩久客思歸未賜環登高
且上鳳凰山空將青眼看重九不見黃花露一斑老
境更從天卜健僧房常記客偷閒廣文不是無官舍
那得清幽似此間春暮詩忍將愁眼看韶華桃李無
言日月斜晚白菜肥蠶出火冬青花落燕成家歸田誰

復如賓饁入室今惟對影嗟無可柰何聊且睡不勞
春夢繞天涯雲濤軒詩高臺圖畫自天開下有軒居
亦壯哉雲氣四時多似雨濤聲八月大如雷直看槎
泝天潢去莫遣舟乘雪夜回擬待他年具舟楫中流
小試濟川才安節堂詩晚節何由得此安阿兒能孝
母心寬螭蚌曉饌來江浦絡緯秋聲上井闌松栢耐
於花易過衣裳偏是綵宜看登堂為爾歌眉壽春酒
香濃柰子丹

西湖遊覽志餘卷十二